



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail: tiryimym@gmail.com

TAPAK 7

Yangia anidakangma :



Tir Yimym



tir\_yimym



tir yimym

TAPAK 8

**US-Iran ceasefire nung Lebanon maden: Netanyahu**

**Romania nunger nungtugu coach Mircea Lucescu siüogo**

VOL. XXIII ISSUE NO. 175 (ADOK 175) DIMAPUR YANGTEPNÜ (THURSDAY) RONGCHII (APRIL) 09, 2026 ₹ 5.00

## Chümoukedima nung tanü 'paid holiday' agütsür

Dimapur, April 8, 2026 (TYO): April 9, 2026 nü Assam Legislative Assembly elections atema polling anogo 'paid holiday' asütsü ta Chümoukedima Deputy Commissioner Polan John-i metetdaksüogo.

Voter temi pei vote agütsütsü atema Representation of the People Act, 1951 nung Section 135B nung lateta aliba ama iba tetuyuba agütsür ta pai ashi.

Iba 'paid holiday' ya Assam nung Assembly Constituency

balala nung registered voters ajak atema lir ta Chümoukedima DC-i sangdong ka nung ashi.

Parnok ya shishilembaba, industrial undertaking, mesüra Nagaland nung tanga wadang balala nung inyakertem asütsü akok ta paisa ashi.

Ajisüaka, lendong ajurutsü mesüra takoksa tulu ajurutsüsa mapa inyakertembo atemabo iba 'paid holiday' ya magütsür ta Chümoukedima DC John-i metetdaksüogo.

## Tanü Assam assembly election agir

**Guwahati, April 8, 2026 (Agencies):** Assam nung züngsem 126 agi akümba assembly atema tanü polling agir aser constituency teimbaka nung BJP-i aniba NDA aser Congress-i aniba opposition teloktep tsüngda tokteper.

Assam nung BJP-i kümsük asemben atongtepa sorkar akümtsü meranger aser Congress-i parnok 2016 küm atüngdokba sülen sorkar akümtsü meranger.

Taküm Assam assembly election atema candidate ajak agi 722 lir. Tanep 7:00 ako nungi tenzüker nikongdang 5:00 ako tashi district 35 kübok polling stations

31,490 nung votes agütsütsü.

Taküm elections nung Congress candidate teimba lir aser parnok 99 tokteper. Congress sülen BJP candidate 90 aser AIUDF candidate 30 lir.

Maneni, NDA den yariteper AGP candidate and 26 aser BPF 11 lir. Opposition party tem nungi Rajior Dal candidate 13, Assam Jatiya Parishad 10, CPI(M) 3, APHLC 2, AAP 18, UPPL 18, TMC 22 aser JMM candidate 16 lir. Parnok dak alia independent candidate 258 lir.

Chief Electoral Officer Anurag Goel-i polling stations ajak nung webcasting asütsü ta metetdaksüogo.

## Mizoram sorkari HPC(D) den yimjung yanglur

**Aizawl, April 8, 2026 (Agencies):** Mizoram sorkari April 14 nü Lalhmingthanga Sanate-i aniba Hmar People's Convention (Democratic) den peace agreement ka nung sign süteptsü.

Manipur den arrtsülen aliba Sakawrdai yimtsüng nung iba sentong agütsü.

"Sorkar tenüng nung Home Secretary aser HPC(D) president Lalhmingthanga Sanate nati agreement nung sign asütsü" ta State Home Department-i metetdaksüogo. Iba sentong nung Adviser to the Chief Minister (Political) Lalmuanpuia Punte adentsü.

Iba sentong nung telungpur 43 temai adoktsü aser parnoki prangpong bener arutsü imlar. Temai adokba telungpurtem ya tan ita rehabilitation process ka nung adentsü.

Tawa Aizawl nung sorkar ketdangsürtem aser Sanate-i aniba HPC(D) teshimtet telok ka tsüngda senden amenba sülen iba agreement agütsü.

Sanate teloki olemtepdang political takhangba kecha maliasü saka parnoki terenlok mapatem aser talisa Sinlung Hills Council (SHC) area nung connectivity tajungba akümtsü dang meshi ta osang angazüker.

Parnokisa tesüiba telungpurtem rehabilitation aser general amnesty den külemi Ministry of Home Affairs norms ama senotsü teyari agütsütsü meshir.

1980s tatemlen nungi Hmar telungpur maparen tenzüka liasü aser Sanate-i aniba telok ya tatembangba ama züngshir.

1986 nung Hmar People's Convention (HPC) tenzüka mapang nungi movement tenzüka liasü aser parnoki Mizoram nung Hmar nunger aliba tesemtem nung pei sasa ketdangsütsü akhanger.

April 1987 nung HPC-i Sixth Schedule kübok autonomous district council ka tentetsü takhangba agüja armed movement ka tenzüka liasü. Ajisüaka, July 27, 1994 nung Mizoram sorkar aser HPC tsüngda Memorandum of Settlement ka sign sütepa Sinlung Hills Development Council (SHDC) tentet. Iba sülen telungpur 308 tashi temai adoka liasü.

Ajisüaka iba agreement inyakba nung temulung m asüba agi HPC telok ana lemdang aser Lalhmingthanga Sanate-i aniba teloki HPC(D) kümer telungpur mapa maneni dang inyaka aru.

## TANÜ 28-KORIDANG BY-ELECTION AGIR Candidate trok rongnung shiba adoktsü amai?



Daochier I Imchen | Abenjang | T Chalukumba Ao | Imtiwapang | Imchatoba | Maj. Toshikaba

**Sashimeren Jamir Mokochung, 8th April, 2026:** 9th April, 2026 nü 28-Koridang Assembly Constituency by-election agütsü aser vote-ji 5th May, 2026 nü azüngtsü. Service nung alir aser polling anogo station nung malitsüpur atema 4th April, 2026 nüto postal ballot agiogo.

11th November, 2025 nü Advisor & MLA, Imkong L Imchen asüba ajanga menden tazüng adoka iba by-election agütsüsa kümatok. Nagaland nung election agiba rongnung candidate aika adoka toktepbaji tan Koridang by-election ya-a ka asütsü ta nüburtemi jembir.

Candidate par trok (6) rongnung tambusangji - Indian National Congress (INC) candidate T. Chalukumba Ao (Chungtia) asütsü, iba sülen Independent candidate Imchatoba Imchen (Mangmetong), National People's Party (NPP) candidate I. Abenjang (Longkhüm), Independent candidate Maj. Retd. Toshikaba (Chungtia), Independent candidate Imtiwapang (Chungtia) aser parnok rongnung tanubusang asür Imkong L. Imchen'er jabaso BJP & PDA consensus candidate Daochier I. Imchen lir.

Koridang constituency otsü repringdangra, national party nungi adokbabo 1987 & 1989 nung Nokzenketba (Indian National Congress) aser 2023 nung asür Imkong L. Imchen BJP nungi adok. Iba dak alaka tanungba MLA-temjibo

Independent aser regional party nungi dang adokba angur.

Taoba 2023 state election nung Imkong L. Imchen (BJP) o Major Toshikaba (NPP) na sashi-sashia toktep aser vote 410-i Imkong L. Imchen-i takok angu. Imkong L. Imchen ya election punguben medangdangi adokba yimsüsür ka liasü aser tang tashibo pa ya Koridang nung MLA talangtiba inyaksang lir.

INC candidate Chalukumba ya tan by-election-i aiba züngabo pezüben asütsü. Election asem rongnung pai tajungtiba ngutetbaji 2018 election nung Imkong L. Imchen (NPP), C. Lima Imchen (NDPP) aser pa NPP nungi toktep aser 128 vote agi dang pa tamakok angu. Imkong L. Imchen ya 2003 küm Independent nungi, 2008-2018 NPP, aser 2023 BJP nungi adok. Daochier, Imtiwapang, Abenjang aser Imchatoba par pezü yabo tang mezüngbuba election nung tokteper.

"Taoba mapangbo election nung nübu shiba tetemsü aser shiba shim nung nübur asoshi tajungba asütsü ta tangatetba nung shilem agi, saka tanübo shibai sen teimba amshir, shibai tashiyim amshir, shir yim vote teimba, parnok jagi dang teimba akoker, iyongji tetemsü lenir shimtsü kanga saka kümogo", ta iba osangbeneri Koridang nung voter ka den jembidang pai metetdaksü.

Koridang constituency kübok yim tulu pezü lir- Longkhüm, Mangmetong, Khensa aser Chungtia. Khensa yim dak alaka Chungtia nungi candidate 3,

Mangmetong nungi 2, aser Longkhüm nungi ka lir. Anungji, Khensa, Yimyu ward & Meküli voters-temi shiba nem teimba agütsür, ta asüba nung telemteba agütsü, ta nüburtemi jembidar.

Candidate par 6 prongla pungmang jenti bener alima nübur tenzüksü tejangraba tulu yur election nung noktakba ola sabang balala ajanga asenoki angashiogo. Par trok prongla nübu tajung tesa, anungji, shiba adoktsüar shingai meshiteter, kechiyong politics nungbo asenoki meimlabasa ataloker.

2024 Lok Sabha election nung PDA sarkar külen aser MLA kata maliba Congress party kisüng külen ta toktepa, PDA sarkar-i makok. Laishiba nunga David o Goliath otsü amato. Anungji, politics nungbo shingai shinga zübazüba (underestimate) agütsüla masü. Nenokia shiba adoktsü amai bilemer?

Election shia Koridang constituency nung ya lendong balala ataloka aruba asenoki ajangshiogo. 2023 election nunga taküm ka sama aser tanba by-election nunga ka samaogo. Election Commission of India (ECI) ajanga election temzüng aser inyakyim sashi-sashia renemer liaka lendongji odang ataloker.

Taküm-a lendong ataloktsü akok ta bilemba yim kar nungbo curfew yoka lir aser party kimen-a agiindaksüogo. Anungji, tanba election ya-a tesünep nung agütsü asü lendong ataloktsü'ar nübur aika mulung nung tarendakba aliba osang ajanga lazüker.

## NPP-i ECI dangi IRB police jilu benshirtem anema shidi zülu

**Dimapur, April 8, 2026 (TYO):** 28-Koridang Assembly Constituency nung nisung kari Indian Reserve Battalion (IRB) police personnel jilu benshir ta National People's Party (NPP)-i Election Commission of India dangi ken o ka benogo.

"Item nisungtem ya Chungtia, Longkhüm aser Mangmetong yimtsüngtem nung mapa lezmükja lir. Pamoki yimdaklirtem senzusenbong azüoker aser voter temi shilem junga magitetsüsa tetsübu tensa ka adoka lir" ta

NPP National Secretary Saidul Khan-i ashi.

Nisungtemi sepai jilu benshiba ajanga election maparen nung timtem agütsür aser iba ya Article 324 kübok election talenba kecha melii aser tiptema agütsü lateta aliba alema lir ta NPP-i ECI dangi shidi ka züluogo.

NPP-isa ECI dang Koridang Constituency nung IRB personnel ajak indang maitsü jangjatsü aser ozüngi memelaba nisung ajak agientsü ayongzükogo.

Iba constituency nung shinga tsütsü tejak mashitsü atema IRB melena Central Paramilitary Forces (CAPF) lezmükjang ta NPP-isa takhangba agütsüogo. Parnokisa iba teblemtsü ajurua aliba yimtsüngtem nung central observers mapa lezmüktsütsü mepishiogo.

Iba shidi indang copy ka NPP-i DGP, Nagaland dangi yokogo aser iba nung security personnel maitsü jangjatsü aser jilu benshirtem dak ozüng tapet agi merenshitsü mepishiogo.

### Mokokchung nung District Level Launch of SUMAN ayongzük



CMO Office Mokokchung nung Bodhbarnü District Level Launch of SUMAN alidang tangokba noksa ka nung Dr. Limanaro DPO (UIP & RCH) Mokokchung den training agirtem angur.

**Dimapur, Rongchii/April 08 (TYO):** Anogo ka District Level Launch of SUMAN notified facilities and Review of Maternal Activities sentong April 8, 2026 nü CMO Office, Mokokchung indang Conference Hall nung Dr. Limanaro DPO (UIP & RCH) Mokokchung shisalen sayur ama agia liasü. Iba sentong nung Dr. Limanaro-i SURAKSHIT MATRITVA AASHWASAN (SUMAN) ya tanur tetsü aser

kinü tanur asüba nungi kumzükba sentong ka lir ta ashi. SUMAN kübok service Guarantee Packages asem lir aser itemji Basic Package, MEMONC Package aser CEMONC package alitsü ta lai metetdaksü. DPO-i training agirtem dang VHND mapang health dak sendakba inyaksangshi ajunga nung awareness talk adokdaksütsü ajungshia liasü. Mokokchung district kübok

SUMAN certified pezü aser SUMAN notified Health units 33 lir ta lai ashi. Iba sentong nung High Risk Pregnancy, ePMSMA, Gestational Diabetes Mellitus aser MPCDSR onük tem jembia liasü. Training agirtem nem reporting formats tem filling up atema angazükdakja liasü. Iba training sentong nung SMO, MOs, CHOs, Staff Nurses, GNMs, LHV's aser ANMs dena liasü.

### Shamator nung lenmang aser Toshi Wungtung Memorial Clock Tower semzük



**Dimapur, Rongchii/April 08 (TYO):** Advisor, Youth Resources & Sports aser Chairman, Shamator DPDB, S. Keoshu Yimchunger-i April 7, 2026 nü Shamator nung Shamator Town Road improvement project aser Toshi Wungtung Memorial Clock Tower semzükja liasü. Iba sentong nung Advisor Keoshu Yimchunger-i jembidang, nüburtem ajangzüksü mechi lenmang

blacktopping mapa ya inyak ta ashi aser iba project nung shilem tajung agiba atema Shamator Town Public Forum, District administration aser nüburtem dang pelaba lemsatepa liasü. Clock Tower Project ya Toshi Wungtung-i tenzük aser tarutsü lenirtem ajungmesotsü atema pa nungtem nung iba nungja ya agütsü ta ashi. Pai ano Toshi Wungtung Memorial Clock Tower nungi Public Ground, Shotang Traffic

Point nungi Veterinary Office, aser Shotang Traffic Point nungi PHED ward ajanga St. Xavier Road densema tanüingba lenmangtem maneni yanglutsü sentong lemsatepa liasü. District kumtetba sülen jila nung terenlok maparen nung temulung asür ta Yansomong, VP, YTC ajanga iba sentong nung ashi aser Neoji, Secretary, Shamator Town Public Forum ajanga S. Keoshu nem tenüngsang agütsü aser project renemtsü atema tower nung anütetsü ka inoktsü ajungshia liasü. Podi Kapo, SDO Civil-ia Shamator nung kanga kera terenlok mapatem inyakba asoshi tenüngsang agütsü aser nüburtemi nukla tajung akaba lenir shimba ajanga lir ta ashi.

### FAC-i Eagle Crest Institute den MoU zülutep



**Dimapur, Rongchii/April 08 (TYO):** Fazl Ali College, Mokokchung aser Eagle Crest Institute tsüngta Memorandum of Understanding (MoU) ka April 7, 2026 nü Institute nungi Admin & Training Head, Juniper Pho maser College Principal Dr. Wati Imchen lia zülutepa liasü. Eagle Crest ya

Nagaland Skill & Entrepreneurship Development Mission, IDAN den külem sür inyaker. Iba MoU yagi College ajanga admission agiba candidate dang sen ajemer agitsü. MoU zülutepba sülen kaketshirtem asoshi seminar ka ayongzükba liasü, kong shisalen sayur

Chumbeni Kithan, Business Development Executive cum Soft Skill Trainer ajanga Institute-i talisa aviation, cruise line aser hospitality nung rangoker placements programmes agütsüba, eligibility, training aser tajangzük indang lemsatepa liasü. Iba sentong nung kaketshir aser tesayurtem dena liasü.

### State tesem ajunga nung 8th Poshan Pakhwada alitsü

**Dimapur, Rongchii/April 08 (TYO):** Ministry of Women and Child Development ajanga linük tesem ajunga nung ayongzükba den lirumedema Nagaland nunga State Programme Management Unit (SPMU), POSHAN Abhiyaan, Department of Social Welfare, Nagaland ajanga April 9-23, 2026 anogotem 8 buba Poshan Pakhwada alitsü. Iba campaign ya 'Maximizing brain development in the first six years of life' omen nung ajemdaker alitsü aser iba mapang Nagaland tesem balala nung anganwadi workers, frontline functionaries,

tsürabor, caregivers aser nüburtem anidena tanur ka ainba nung chiyongsü aser yimya balala nungdakba indang angazükdaksütsü. Iba mapang state tesem balala nung nutrition & health awareness, community mobilization, service delivery initiatives, early childhood development, behaviour change campaigns, skill & awareness activities aser strengthening anganwadis densema awareness sentong balala ayongzükba agitsü. Iba sentong nung stakeholders aser nübur ajunga shilem agitsü asoshi department-i ayongzükba liasü.

### Zunheboto nung Child Rights & Protection indang awareness agütsü



**Dimapur, Rongchii/April 08 (TYO):** Nagaland State Commission for Protection of Child Rights ajanga District Child Protection Unit den lungjemer "Child Rights & Child Protection" indang awareness sentong ka April 8, 2026 nü VDB Hall, Zunheboto nung ayongzükba liasü. Iba sentong nung tanurtem kumzükba ayuba aser legal frameworks balala nung rangloker sessions tem agia liasü. Sentong nung Childline Coordinator, Pollen Yepthomi onir liasü aser NSCPCR Chairman, Alun Hangsing-i iba sentong ayongzükba nukjidong lemsatepdang tanur temeden otsü aser melenshia aruba indang rateta ashi. Tanurtem ya linük indang tongtired lir, anungji parnok kumzükba ayutsü aser renlokdaksütsü asoshi groundwork tajungba inyaktsüla, ta pai ashi. Pai stakeholders tem dang tanur temeden süoki ia agitsü ayongzük aser tanü tensa nung tamajung angazüktsü aser tamajung lenmang nung jajatsü kanga melaa kumogo, anungji awareness kanga tongtipang kumogo ta ashi. Deputy Commissioner, Zunheboto, Tiameren Chang-i iba sentong nung jembidang Commission-i iba sentong ayongzükba asoshi pelaba lemsatep aser shilem agirtem dang pei aliba tesem nung tanur temeden indang osang prokshitsü ayongzükba liasü.

Iba sülen Legal Consultan, NSCPCR Lichani Murry-i Juvenile Justice (Care and Protection of Children) Act indang onük nung ajemdaker jembia liasü aser Member NSCPCR, Akumla Longchari-i Protection of Children from Sexual Offences Act indang jembia. Kasa mapang District Child Protection Officer (DCPO), Ruzonuo Rita Aye-i district nung tanur dak sendakba nung inyaksangshi indang osang lemsatepa liasü. Aye-i Zunheboto district nung March 2025-2026 mapang child protection aser juvenile justice inyaksangshi indang osang tongmelang agi lemsatepdang, juvenile justice ken o ka liasü aser ibaji tang mebenteti lir ta ashi. Childline 1098 service kübok district nung calls 41 liasü, anungji nüburtemi shilem agiba aser tanur dak sendakba tebilemstü lemsatepba aliba sayur. Child welfare dak sendakba nung Children in Need of Care and Protection (CNCP) indang ken o 22 zülüoka tim yimya nung bentetogo. Tang district nung Child Care Institutions (CCIs) pezü lir aser yangji Non-Governmental Organizations (NGOs) indang ana lir, Juveniles in Conflict with law (JCL) ka aser Specialized Adoption Agency (SAA) ka lir. Iba sendong nung sensaksemba mapang liasü aser Legal-cum-Probation Officer, DCPU, Lavijing-i melepzüng o jembia.

# TMC nungi teshimtet telok kati Election Commission ajuru



April 08, 2026 nü New Delhi nung Chief Election Commissioner Gyanesh Kumar den Election Commissioner ana- S Sandhu aser Vivek Joshi nungeri Trinamool Congress nungi telok ka ajurudang tangokba noksa nung angur.

**New Delhi, Rongchii/April 08 (Agencies):** Bodhbarnü Trinamool Congress (TMC) nungi teshimtet telok kati Election Commission nung tongti ketdangsertem ajuru, ajisiüka minute tenet tsüingda parnok EC office toktsür oadok.

Osangbenertem den jembidang TMC lenirtemi, Chief Election Commissioner (CEC), Gyanesh Kumar ya auer aser ozüing alema inyaker ka; pai bendangshidanga züingshir, ta aitsü.

TMC lenirtemisa, CEC-i parnok dang oadokang ta shia sendenji minute tenet tsüingda tembangadok, ta metetdaksü.

TMC lenir, Derek O'Brien den party nungi Rajya Sabha MP ana- Sagarika Ghose aser Menaka Guruswamy aser taoba mapang MP Saket

Gokhale nungeri EC ajurua liasü. Osangbener den jembidang O'Brien-i, "Tanü nikongdang 4:30-4:45 ako nung BJP anemba party temi Constitution Club nung osangbenertem senden ka ayongzüka akatsü," ta ashi.

Rajya Sabha MP, O'Brien-i, "Onoki TMC tongti Mamata Banerjee-i züluba shidi teku Election Commission nem agütsü, ajisiüka shidi kata magizük mesüra telangzüba magütsü. Onoki parnok dang, item shidiji Narendra Modi mesüra Amit Shah na dang nungi aruba asübo CEC-i idangyongjisa agizükla ta ashi," ta metetdaksü.

TMC-isa Bengal nung BJP den tesendaktep aliba officers tenüing trok den noksa densema kuli EC nem agütsü, ta pai metetdaksü.

"Onoki Nandigram nung BJP nung inyakterem den külemi anguba CEO densema parnok ajak transfer süjang ta shiogo. Iba temepishibaji benoktsü atema minute 2-3 dang agi. CEC-i tongmelang agi onok dang 'oadokang' ta ashi," ta paisa metetdaksü.

O'Brien-i, party züingsem ka nem danga o jembitsü atema CEC-i temelaba magütsü, ta ashi.

"Ni TMC nung adenba sülen küm 22 jungogo aser Parliament nung küm 16 jungogo; iba mapang nungji ni ketdangsertem aika ajuruogo, ajisiüka tanü ni ajangshiba yabo taaktsüka lir," ta paisa metetdaksü.

Tesülen O'Brien-i, nikongdang osangbenertem senden ka akatsü, anungji iba senden nungji BJP anemba party ajak dendaktsüner, ta metetdaksü.

## "Sür Küm Ka Ajungba Menungra Bilemteter"



**Prof. A. Lanunungsang Ao**  
16th April 1944 - 9th April 2025.

"Ni asoshi taküm alibaji Khrista aser tasütsüba Tajangzük lir."  
Filipi 1:21.

Onoki teti na menungra bilemer -

~ Temeim Kinungtsü, Chirnur, Semchirtem, Kinunger aser Medemertem.

## US aser Iran tsüingda ceasefire ji India-i pelaa agizüker: MEA

**New Delhi, April 08 (Agencies):** United States aser Iran tsüingda ceasefire tezüingzüktep agibaji India-i pelaa agizüker aser iba ya ajanga West Asia nung yimjung atema lenmang lapoktsütsü imlar, ta Ministry of External Affairs (MEA-i) metetdaksü.

Bodhbarnü MEA-i sangdong ka ajanga, "Ceasefire atema bangjembaji onoki pelaa agizüker, aser iba ya ajanga West Asia nung yimjung atema lenmang lapoktsütsü onoki imlar. Tang aliba rara tekeraba nung anentsü atema atsü-anem akatsü aser ken o jembitsü atema onoki ajungshia arur," ta metetdaksü.

MEA-isa, iba rara ajanga alima nung shishilembaba aser energy supply kanga mejungi kongshiba metetdaksüba den

külemi khu sademsadema shibelentsü atema Strait of Hormuz ya lapoka dang yutsütsüla, ta metetdaksü.

US Tir, Donald Trump-i, khenipga atema Iran anema rara anena atatsü ta sangdongogo.

Trump-i, iba telemtetba ya külemi bangjembaji lir, anungji ceasefire mapang nungji US aser Iran napronglai meraratsü, ta metetdaksü.

Trump-i ashiba agi, Iran-i Strait of Hormuz tzüyim lenmang lapoktsütsü melungba sülen iba nungji ajemdaker rara anena atatsü telemtetba agi.

India-i rara mapang nung telok ajak dang ken o jembiba aser yimtenren ajanga dang rara tekeraba nung anentsü aser mangatettep bentettsü ajungshia arur.

## Kerala nung candidate shilem 38 anemabo ken o benoka lir: ADR

**New Delhi, April 08 (Agencies):** Kerala Assembly elections nung toktepter candidates 883 nungi candidate 324 (shilem 38) anemabo ozüing alema inyakra ken o balala benoka lir, aser iba nungjagi candidate 201 (shilem 23) anemabo ken o tulu benoka lir, ta Association for Democratic Reforms (ADR)-i metetdaksü.

Election Commission of India nem candidate temi agütsüba affidavits nung aliba osangtem nung ajemdaker iba report ya renema liasü.

Tongti party tem rongnung,

Congress candidates 85 nungi parnok 72 anema ken o benoka lir, BJP candidates 93 nungi parnok 59 anema ken o benoka lir aser CPM candidates 77 nungi parnok 51 anema ken o benoka lir.

Kerala nung assembly menden 140 nungi 59 (shilem 42) bo 'red alert constituencies' lir, aser item constituency nungbo ozüing alema inyakra ken o alir candidates asem mesüra iba dang nungjagi teimba lir.

Kerala assembly election nung tokteptsüpur candidates

883 lir aser iba nungajagi candidates 863 indang affidavits dang asadanga liasü. Candidate kar indang affidavit merenemjembaja mesüra affidavits mejangjaba ajanga itemjibo masadang.

Supreme Court-i teladak asütsü atema tetuyuba agüja lir, ajisiüka yimtenren party temi maneni ozüing alema inyakterem shima election nung toktepdaksür.

Kerala nung legislative assembly elections April 9 nü agütsü aser May 4 nü vote azüingtsü.

## Nitish Kumar-i Rajya Sabha MP tenangzükba agütsü

**New Delhi, April 08 (Agencies):** Taoba mapang Bihar Chief Minister Nitish Kumar-i April 10 nü Rajya Sabha MP tenangzükba agütsü.

Bodhbarnü Minister Vijay Kumar Chaudhary-i, "Sorkar tasen makümdang iba ya mezüingbuba tongtibang mera ka asütsü. Nitish Kumar-i April 10 nü Rajya Sabha nung tenangzükba agütsü," ta metetdaksü.

Ano Bihar nung BJP national Tir Nitin Naveen aser Sivesh Kumar na densema tang tasen shimba Rajya Sabha MP temi April 16 nü tenangzükba agütsü.

BJP-i ashiba agi, April 10 nü Delhi nung Bihar BJP lenirtem senden ka amentsü aser iba senden nungji Central lenirtem aser state BJP lenirtema adentsü.

Iba senden nungji Bihar BJP Tir Sanjay Sarawagi, deputy lenir Samrat Chaudhary, Vijay Kumar Sinha, Nityanand Rai, Sanjay Jaiswal, regional organisation secretary Nagendra, state organisation secretary Bhiku Bhai Dalsania, minister Dilip Jaiswal aser minister Mangal Pandey nungera adentsü.

Iba senden nungji state core committee nungi Bihar Chief Minister shimtsü.

## DMK-i mapa lakh 5.5 nangzük saka 94,000 dang agütsü: AIADMK

**Chennai, April 08 (Agencies):** Bodhbarnü AIADMK tongti lenir, Palaniswami-i Tamil Nadu chief minister MK Stalin aser DMK aija, DMK-i mapa tazüing lakh 5.5 atema lanurtem shimtsü ta nangzük liasü, ajisiüka tang tashi nung nisung 94,000 nem dang mapa agütsüogo, ta metetdaksü.

Chennai nung osangbenertem den jembidang pai, "Chief Minister Stalin-i sorkar mapa lakh 3.5 densema mapa tazüing lakh 5.5 atema nisung shimoktsü ta nangzük ajisiüka nisung 94,000 nem dang mapa agütsü," ta metetdaksü.

Taküm February 16 nü sentong ka nung Stalin-i nisung 1,598 mapa nung shimokba shidi agüja liasü, aser iba mapang

nungji pai, recruitment boards ajanga nisung 27,858 mapa nung aniokogo, ta metetdakja liasü.

Stalin-i, "DMK sorkar akümba mapang nungi sorkari lanurtem atema mapa adokdakja maongka agüja arudar. Tanü mapa nung shimokertem ya taküm June ita tashi nungbo nisung 10,000 mapa nung shimoktsü atema inyakra shilem ka lir," ta metetdakja liasü.

Paisa, sorkari taruba küm ana tsüingda nisung 50,000 mapa nung shimoktsü, ta metetdaksü.

Palaniswami-i DMK sorkari mapa manguba tebilemtsü atema junga meinyakra nung ajemdaker sorkar aija arudar.

Tamil Nadu nung assembly election April 23 nü agütsü.



April 8, 2026 nü Kolkata nung West Bengal Chief Minister aser Bhabanipur constituency nungi TMC candidate, Mamata Banerjee-i state assembly elections nung tokteptsü atema nomination file asüandang tangokba noksa nung angur.



## TIR YIMYIM YIMOBILEM (EDITORIAL)

DIMAPUR THURSDAY, APRIL (RONGCHII) 09, 2026

### Tejaklenbotejaklen saka mashilen!

**T**anü putu nunga Aotsür Aortem ya maparen aika nung tejaklenbo tejakleni odagi saka taoba tsüraburtem putu nung ama masü, tejaklenbo tejakleni aoer saka mashileni aoer . Tetezüji, advancebo advance aser pioneer-a pioneer saka tamajunglen advance aser tamagitsü nung pioneer, iba jagi asenok asoshi dang masü saka Naga nung ajak nem maksü bener arutsür. Atangji, asenoki inyakba ya anü meraa pua auyar aser menja aponger atsükshishir, anungji asenoki ochimashi mapatem inyakba ya ajaki angur aser meteter, ibayongji tangartemjia advance aser pioneer telok sülenji anidaksüsa akümer. Item mashileni advance asüba mapatem rongnung tanü asenoki kanga sashia Naga nungertem tejakleni anir aotsü merangba mapatemji, election mapang tashiyim amshia akoktsü merangba ya ka aser ano election nungsa vote agütsüba anogo nung shitakba police masü saka taila police-tem nem amokbangdaksür akoktsü merangba mapa ya ka asütsü. Atangji, asenok tejakleni aoer kin asoshibo item mapatem ya tasen masü saka tangar tesülen alir kintem aika asoshi tasen asütsü, anungji tanü asenoki benshiba 'pioneering' mapa tamajungtem ya asüng tangar kintemi benshia angutsü. Aji oda, tang Koridang nung bye-election agitsüba nung dena yimti aika nung tashiyim amshitsü pur nisung tamajungertem police süoshi agir vote agütsüba mapatem amokbangtsü sentong lir ta National People's Party (NPP) teloki metetdaksübaji, asenok asoshibo, election dak sendakba maparentem dang nungi kanga agia tuluba asenok jakla aser asenok shisatsü tamajung alima dang sayur asütsü. Koridang election-bo tanü temadoktsü saka election mapang taküma dena aotsüsa lendong atalokba aser election nung takok ngunüdüng, nisungi mebilemba tasa tamajung dena bener arua inyakba mapatemjibo tangari alima nung mapang talangka asen otsü kuma jembitsü. Atangji, tanü Koridang nung election agiba agi Koridang nung atalokba indang jembir dang ashi, asen lima nung election timi magitetba ya tanü tasen masü. Iba jagi, temeimsüka aser tesasatsüka, talisa election nung adokertem tenüng tali menüker aser tangari akhümketa merepranger. Tangar asenok sülen anidakertembo vote agütsüba anogo nunga vote agütsüdak tarensena nokdaker pei vote peisasa enoktsür pei mapai aoer, saka asenokbo tesem aika nung ajak tenüng nung kari enoktsür, anungji asenok rongnung nisung tain aika küm aika vote meindokdangertema lir. Aji oda, ano asenoki tangar ajateta oa inyakba mapa kaji sarasademer proxy vote agütsür aser sarasademer tashiyim agi akoktsü meranger. Iba ama tim masüba mapa jagi asenoki tangar mangmangdaksür asü mesüra tangari asenok menütsür ta bilema, asenok ya khen tesülen atsüngzük nungang tajungba asütsü, kechiyong tang asenok tejakleni aoba yabo tajung tazü ka nunga oa atemtsü. Atangji, asenok ya advance telok, iba jagi tangar melen proxy vote agütsü nung dang adoktsü ta shisatet südi. Aji oda, kasa advance kolok jagisa yimtsür yimertem rongnung akok tashi meraratepi "Senso candidate" ka shimtsü aser iba nemji yimer ajak tenüng nung nisung asem pezü kati dang vote agütsütsü ta shisatet asütsü. Ano, asenok advance teloksa tekoloka tulubaji kechisüdirsüaka 'Senso candidate'-isa akoktsü atema tanga polling station nung taila police renemer yoktsü aser parnok jagi amokbanger alidang, nisung ana asem kati vote agütsüba mapa temadoktsü ta ratet asütsü. Tanü putu nung, tesasatsüka, asenok item mapatem nungji kanga advance aser asenoksa pioneer lir. Atangji, akhi putu nung temeim agi tangar nüchi kumdaksüba kin memesük, tanübo asenoki inyakba mapa ya nüchi purtemi inyakerbo memesük inyaker. Asenok dak temeim aser taaktsü mali kümogo. Tanü asenoki inyakba mapatem aser asenok libalirutebpa tia ya reprangdangra, election mapang taila policetem aniloka takok angutsü merangba amaji, asenoki inyakba mapa ya tagitarutsü kuma aotsüba mapa ka masü, kechiyong asenok tasoba küm nungi tenzüker asenoki amshiba sen aser asenoki anguba takok aser naroküm ajak ya taila lir. Aji meteta, asenoki tang taila naroküm aser taila takok ajakji toktsür , khen atemabo takoksa arema, shitakleni meyiptsüla.

## OLEMSABANG

### TEMBAR ANA OTSÜ

- K. Moatoshi

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Nebukadnezzar Chuba ama temeneni pa melungjang nung asüküm aser mezümeküm shisatsü inoktsü. Anungji pai tanger züngshia mali pa sunetsü sua pa jembinutsü jembia alima rongsen dak temulung lemer pai teyanglur Tsüngrem- a sendok. Item tai temenen pai inyaksaba mapatem ajak bilemteta pa temelong kanga raksa ajeb. Konangba taküm nung taitzüba agi sunga liasü. Meimchir taküm ya tesempatsü agi sunger liaka Tsüngremibo odang meimerji Aremzüksangi-bo pa tembari pa dak mejungi penshiaka kanga aria bilema meim. Pa temelungjang nung pa tembar asoshi kecha tamajung bilema mali asü. Anungji Aremzüksangi pa tembar kibong nung tamangu lendong ataloker tamang tia nung timtema teyarir shinga malidang yakta aramesoa pa medemsang yaritsü melungtet.

Aremzüksang temelungsentsü temeruk pa dak, pa tembar asoshi temelung nung tako tasen kecha mali nung kinungtsü tenati pa medemsanger kibong tena taküm ali tashi yaritsü asoshi mulungtet. Konangba kibong nung asüwa-na ta tamangu lendong tulu jebaka nuksu malu ama, takomarok ajemdang Aremzüksangi pa tembar kodanga sengzüka metoktsü. Tsürapuri jembia aru ama Konangbar kibong "Matem agi tembang". Ajungbena meimlaba mapang ka nung "Anung lung agi nembang". Kibong ajunga ama anujungi tembanga ao. Item tatalokba tem ajak ajangshi dang Konangbai Tsüngrem dang pa akümlir tashi ita aliba mapang inyaksaba ajak asoshi tai takok meshia anogo apen jeba sarasadem. Saka anu tayi-i tsük apu ama kibong tia po jeko lua marutet pai menur dang apijem nung kanga sasa. Temeimtsü Konangba iba ama tia nung lia akümlir wadang tempang. Pa akümlir nung alidang pa sulen anidaker aser pa pusemertem tu par kibong nung timtem lendong atalokdang pa yarir shinga mali asü. Alima meimchirtemji konangba pusemer masü, pa sulen anidaker masü, rongsen sulen anidakba dang asü. Pa timtemba aser nuktsü makong alidang pai mezüngmeshia sentokba sensaksang pa tembar Aremzüksang dang pa den liasü. Iba amaji konangba tepenjem mapang nung Tsüngrem aser nisung tsüngtang kechi majung aji pai inyak nung akümlir temi konangbar kibongji "tansutsü kibong" ta jembia aru.

Tsüngremi "Asükümer Nokdang" aser 'Ajemalur dang taochi sayur" asü nung Aremzüksang aser kinungtsü tena par yimer asoshi "kiyong tongshi" aküm. Par jala jabaso ajak tajung aküm nung Arogo, yimten aser yimer loktiliba ajak khuret par kibong-i tongzüka, rongsen, shisatsü aser nupo ajak agi yimer nem teyar agütsü. Aremzüksang jabaso tampusang Medical Doctor asü nung mapang mapang shia yimdak shiranger aser tantsür tamburtem anepalua nungdakba purtem yaria sa aru. Jabaso tanübo sang Engineer aser jala kinungbo minister anungji parnok yimtak yimer nungdakba terenlok mapa aika inyaktsü. School ki tajung yanglutsü, lemang tajung yanglutsü aser tzü tajemtsü bener arutsü, mepu shia tzüpo tulu kaka yanglua tzü talubusa jemdaktsü. Iba amaji Aremzüksanger chirnur aser anukapang temi yimtsüng terenlok asoshi mapa tajung jenti inyaktsü. Ano yimer lanurtem Army-i aotsü jangrartem jenti Army nung mapa agütsü. Aser mapang shia Yisu asoba benjong aser küm tasen benjong Aremzüksanger chirnurtem aser Anukapangtemi chiyong daktsüa arogo khuret ajak tongzüka sa aru. Benjong mapang nung yimer tantsür tamburtem aser sensaker leni maortem nem sempet agatsü, chirnurtem aser anukapangtem yimtak benjong amongi arubaji Yimertem asoshi temoatsü tulu liasü.

Pela alibaji mozü tajungtiba asü nung Aremzüksang aserkinungtsü tena chirnurtemi pela anisungzüka toktsüba agi yimtak tena tantsü tambu sua mapang talangka Tsüngremi arishia toktsü. Tena aküm nung yimtak kanga yimchi yimjunga temoatsü nung lia aru. Ano lanurtem tazüngertema jenti sorkar mapa angu, iba amaji temoatsü nung putep putepba yimer tem ajak tena aküm nung lia aru. Akümlirtemi tanü tashi tansutsü otsü jembidang "konangpar kibong" ama ta jembir aser tatishitsü otsü jembidang "Aremzüksanger kibong" ama ta sa jembia aru.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# UK nung Greek Orthodox Church nung nisung 250 bapti



Greek Orthodox Church nung baptirtem kar noksa nung angur.

**April 08, 2026:** Easter mapang UK nung Greek Orthodox Church-i nisung 250 baptisüogo; baptiba sentongji linük tesem ajaklen agia liasü.

Hertfordshire nung nisung teimba (75) baptia liasü.

Arogoi sangdong ka ajanga, Easter mapang baptirtemji teimba kati Discover Orthodoxy programme agir liasü, ta metetdaksü.

Tawa baptirtem teimbaka taintem liasü, ajisüaka tanurtema kar liasü. Tang Arogo nung züngsem tasenpurtemji aika Orthodox linüktem- Greece aser Cyprus nungi lir. Britain & The

Commonwealth, Latin America aser Europe tesem balala nungia aika liasü.

Parnok baptiba sülen parnoki Divine Liturgy nung aden aser tang mezüing Kibuba Benjung nung aden, ta Arogoisa metetdaksü.

"Iba anogo ya nisung aika baptiba anogo ka dang masü saka taküm aliba Arogo ka ainba ama bilemtetsü," ta Arogoi metetdaksü.

Britain nung Orthodox Church dang official süa Archdiocese of Thyateira & Great Britain ta ajar. 1922 küm "Asia Minor Catastrophe" mapang nung iba Arogo ya

tenteta liasü.

Greco-Turkish War tatembanglen kati aruba mapang nung Greek sepaitemi Turkey tesem kar atsünga agitsü meranga liasü, ajisüaka Turkish sepaitemi parnok maakdoka liasü.

Iba kümji September ita nung Turkey sepaitemi Smyrna agia liasü, aser iba sülen Orthodox Greeks million 1.3-i iba region toktsür ajen.

Thyateira ya Jungkai Adok kaket nung shia aliba Arogo tenet rongnung ka lir, aser akhidang iba tesem ya tanü Turkey ta ajaba linük nung liasü.

# Nigeria nung Easter tekülem sentong agidang Khristantem amak

**April 08, 2026:** April 5 nü Easter anogo nung Nigeria kübok Kaduna state nung Fulani kiralongrar teloki Tenla ki ana amakdang Khristan 12 tepsetogo.

Kiralongrartemi Kaduna state kübok Khristan nütsüing aika aliba Ariko jila nung Evangelical Church Winning All aser St. Augustine Catholic Church na nung Khristantem tekülem sentong tagidak mapang nung amak aser Tenla ki anaprong raksatsü.

Osangbener den jembidang Kachia Council Member Mark Bawa-i, "Khristantem amakertemji Fulani kiralongrartem liasü ta jangjaogo. Parnoki Khristantem tekülem sentong tagidak mapang nung longbanger amak. Khristan aika tepsetogo aser 10 dak tali puer ogo," ta metetdaksü.

Jila nung alir, Gideon Michael-i, "Kaduna state nung Kachia LGA kübok Ariko jila nung Fulani teloki Easter tekülem sentong nung adenertem amak. Parnoki kasa mapang nung ECWA Church aser St. Augustine Catholic Church naprong amak," ta metetdaksü.

Nigeria kübok Benue state nunga Easter anepdang 5:00 ako meta Fulani teloki Khristan 17 tepset, ta osang ka ajanga metetdaksü.

Gwer East county kübok Jande yimdak Fulani teloki Khristan aika khaset, aika puer

ao aser ki aika raksatsü, ta yimdaklirtemi metetdaksü.

Benue state Governor, Hyacinth Alia-i sangdong ka ajanga, iba tatalokba ya sashia aitsür aser sorkari magizüktetsü, ta metetdaksü.

October 1, 2024 nungi September 30, 2025 anogo tashi nung alima nung Khristantem teimba tepsetba linükji Nigeria liasü (Open Doors' 2026 World Watch List). Iba mapang nungji alima tesem balala nung yimsü nung ajemdaker tepsetba Khristan 4,849 liasü aser iba nungjagi Nigeria nung tepsetba Khristan 3,490 liasü.

Nigeria aser Sahel region nung Fulani Muslim nung million aika lir, ajisüaka yimsü alia amanger Fulani nütsüingbo ishika dang lir, ajisüaka parnoki Khristan yimstüingtem amaker aser ali rakzüker, ta tamalen United Kingdom All-Party

Parliamentary Group for International Freedom or Belief (APPG)-i report ka ajanga metetdakja liasü.

Nigeria nung Khristan lenirtemi ashiba agi, Middle Belt nung Fulani teloki Khristantem amakba ya Khristantem meyong ali rakzüka agitsü aser Islam yimsü kangshia benoktsü nükjidong nung amaker.

Nigeria north tsütsülen aliba state tem nunga Boko Haram aser Islamic State in West Africa Province (ISWAP) ama Jihad telok balalai Khristantem kanga amaker, ajisüaka sorkari ibaji junga menokdangteter.

Ano tang 'Lakurawa' ta ser kiralongrar telok kasen ka poktetogo. Iba telok ya Al-Qaeda indang Jama'a Nusrat ul-Islam wa al-Muslimin den sendaktepa lir, ta Open Doors' 2026 World Watch List report ajanga metetdaksü.

# Temeshi hopta nung Karnataka state nung pastor ana dak azük

**April 08, 2026:** Temeshi hopta (Palm Sunday-Easter) nung Karnataka state nung pastor anati Shivamogga district kübok yimtsüing ka nung Khristan kaketem lemja senzüba mapang nung Hindu yimsü alia amangertemi tena dak azük.

March 31 anogo nung Brethren Assembly nungi pastor anati anasa aliba yim kati oa Laishiba aser Khristan kaketem lemja liasü; iba mapang nungji Hindu yimsü alia amanger anati tena dang o

tamajung shia amokmeren.

Pastor ana jagi tena meyong gari alidak aotsü merang, saka Hindu nung ana jagi tena nungshia atsüshi.

Hindu nungertem jagi, pastor ana jagi tangartem Khristan yimsü dangi meyipdaksütsü meranger aser Hindu sobaliba raksatsür, ta ashi.

Hindu nung ana jagi pastor ana dak teka sangshiba mapang nung tangartema aruba sülen tena dak azük aser tena ket nung aliba kaketemjia rakzüker.

# ANO GO ABEN TSÜNGREM DEN

## Na kümzüktsü asoshi temenen dokjang

*Aser kodang parnoki parnok yim tezüleni anir aru, pai ashi : Nü taküm asoshi jenang, nai lep-a tereprang aser lenten li nunga tanen, na mesamatsü tenemi jenang (Lipok 19:17).*

Tsüngrem chirtem kümzüktsü asoshi Pa sendong tulu lir. Pai nisung meimchir nem tekümtet agütsür Pa den Kodak nung teti lidaktsütsübaji pa sendong lir. Yangi Tsüngremi pa chirtem anitetsü aser parnok kümzüktsü asoshiparnok anitetta doktsür külen Pai parnok dang ashi : Nenok taküm kümzüktsü asoshi jenang aser tesülen kenyongi meyipa tereprang ta ozüing agütsü. Yangi Tsüngrem O-i ashibaji odang tesülen meyip-a mereprangtsüba indang ashir masü saka tejen mapa aser temenen mapa nungi pilaa alitsü aser tanaben iba den tembar mayimtsü indang ashirba lir. Nisung kati temolung meyipa temenen toktsür aser ano tanaben iba sang nungsa pudaktsüra, ibaji agi tebü Tsüngrem sendong kodanga mataloktsü aser aji pai aginüba masü, anungji Pai yangi Pa chirtem dang nenshia ashibaji, nenoki kechi Temenen mapa toktsüogo aji joko tanaben tebenshi ta ashirba lir. Nisung meimchir ka Tsüngrem den litettsübaji teinyaktsü mapa aika dang lir. Kechiaser Tsüngrem o nung teinyaktsü aser tebenshitsü indang aika dang shia angur. Temenen nisung ka Pa den alitsü makok kechiaser aji Pa den kenyongi mapet. Ni kümzüktsü ta shir külen, nisung kati temenen toktsütsü atsü-ayonga bilemra, aji kenyongi tamashi mapa asütsü. Pa den shidakba techir ka ama litettsübaji temenen toktsütetba takümi dang sütettsü. Lenden lenmang nung manentsü indang yangi Tsüngrem o-i ashibaji, oda taküm nung pei sünütsü süa malitsüba indang ashir. Tatishitsü agi alima lenden nung jajatsüji sadem-sademer aser yangji telinütsü ka dang lir. Yamaji kodang temenen nung lidir, takümji kanga jangaratemtsü ka ama dang asütsü aser yamaji takümji linütsü. Aji saka yamala takümji Pai molungba masü lir ta kanga junga angatettsüla. Anungji Tsüngrem O-i lenden aser tesadem tesem kecha nunga maneni dang, tenem leni dang atutsü indang yangi ashir. Tebu Tsüngremi molungba ama alitsübaji lenmang aika nung tasak ama asütsü, saka kodang Tsüngrem O-ji asen molung taroktiba nung kanga junga rezünga yudir, aji inyaka beshitsübaji mela-melar asütsü. Anungji taküm kümzüktsü atemaji, lenmang lenden aser lisa tesadem repranga masü, saka tenem leni timtem agia atutsüla, yamaji asübaji dang Tsüngremi molungba lir ta yangi Pa O-i techirtem ajak ayongzüker.

Nütsüing billion 1.4 aliba Concern (ICC) den jembidang India linük nung nütsüing shilem pastor Madhan-i, "Mapang 80 jungnüabo Hindu nungertem shidak nung police maru asübo lir, aser parnok teimbakati India onok süadoker lila," ta ya Hindu linük ka metetdaksü.

India nung nütsüing shilem "Mapang shidak nung police iba tesem jagi arua küna 2.3 (million 32) dang kümzükba dang masü saka hospital-ia anir ao," ta paisa Khristantem lir. metetdaksü.

Pastor ana rongnungji ka-arrshi küm 60, Madhan tejak, teku, Karnataka nunga anti-tekolak aser tenük ka yirua liasü, conversion ozüing benoka lir, aser tangu junga mesashiteti aser iba ozüing ya aiben tim hospital-i anir oa liasü. mesüi amshia laktii Khristantem International Christian anema inyaker.

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimyim

**Waropoksü**

(adj) kangasa takar asüba agi kikasüchi mapa temer külena ano yimer den oliorar aser shirurudem dena chiyongdaksüba ( feast of wealth demonstration)

\* Tekoru malir takari waropoksü dena agüja chiyongdaksür.

**Warosü**

(n) waro sentsü enoka atakba tetsür teberem sü ( crowd color women's wear)

\* Tanü asüingbo waro sü tatakari mali kümogo.

**OLONG PAITEP # 7468**

	1	2		3	4	5
6					7	
				8	9	
		10				
11						
			12			
13	14	15				16
17					18	

**TIPLIN**

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S \_\_\_\_\_
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

**LANGTSÜNGLEN**

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. \_\_\_ hi
- 16. Akümüli nungi pilar

**OLONG PAITEP # 7467 TELANGZÜBA**


**TIPLIN :**

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kiooktsü,
- 5. Lenti, 7. Tajangzük,
- 11. Teronem, 12. Sempa,
- 13. Jahaz.

**NAI-A YA METETTER**



Rajasthan nung Bikaner nunger Girdhar Vyas-i bangsemo feet 40 talang waa lir. Vyas bangsemo anatsülen feet metsütsü lir aser ibaji measuring tape ka amshia asazükogo. Pai iba ya Guinness Book of World Records nung züluoktsü atema tenüing agütsüogo.

**Guwahati nung HYBE India audition & Pop-Up Park ayongtsü**



**Guwahati, April 8, 2026**

(Agencies): Guwahati nung May 2 aser 3 anogotem HYBE India audition aser Pop-Up Park experience ayonga agitsü.

HYBE India audition ya tang mezüingbuba atema Northeast nung ayonger aser ibaji Guwahati nung alitsü ta HYBE India posts ajanga metetdaksüogo.

Iba sentong ya May nungi July tashi India yimti balala den Singapore, Sydney, London, Toronto, aser New York nung ayonga agitsü.

HYBE India audition ya May 3 nü Guwahati nung tenzüksü, iba sülen May 10 nü Mumbai nung, Pune, Hyderabad, Bengaluru, Delhi, Chennai, Ahmedabad, Kolkata, aser Chandigarh yimtem agia orr July

25 nung tembangtsü.

Pop-Up Park ya auditions den balaka lir aser Guwahati nung May 2 nü tenzüksü. Iba sentong ya India yimti balala nung agiba sülen June 13-14 anogotem Delhi nung tembangtsü.

Korean entertainment giant HYBE ya BTS tenzükba company lir aser pamoki India tsürtem asoshi auditions agitsü.

2005 aser 2011 tsüingda asor tetsür mashii kati vocal, rap, dance, acting, aser modelling categories nung shilem agitsü akok.

Iba auditions atema July 31 tashi applications agizüksü aser in-person rounds den külemi online participation lir. Iba audition atema BookMyShow ajanga ticket anepalur aser

Snapchat-i platform partner aser Samsung Galaxy-i presenting sponsor ama shilem agir.

Tamil-American nunger Lara Raj-i HYBE company girl group KATSEYE nung shilem agi. Külen, Odisha tsür Sriya Lenka ya BLACKSWAN nung züingsem ka lir aser K-pop group X: IN nung India tsür Aria densema lir.

HYBE India-i yaküm September ita Mumbai headquarters lapoka liasü. Japan, United States, Latin America aser China sülen India ya international base pungububa lir.

Assam Tourism nung Managing Director Padmapani Bora-i yaküm HYBE representative ka den ajurutepa sentongtem agitsü lenmangtem bushitepa liasü.



**REVISED TURNOVER**

W.e.f. April 2026

Thresholds for Food Businesses under the Licensing and Registration Regulations:



fssaiindia fssai fssai\_safefood fssaiindia fssai\_india

State Food Safety Authority, Department of Health and Family Welfare, Govt. of Nagaland.

# US-Iran ceasefire nung Lebanon maden: Netanyahu

Tel Aviv, Rongchii/April 08 (Agencies): United States-i Iran amakba anentsü telemtetba agiba junger saka hopta ana rara anena ataba nungya Israel-i Lebanon nung military operations tenzuka aliba nung mekongshir, ta Israel Ato Kilonser Benjamin Netanyahu indang office-i ashi.

Bodhbarnü X nung sangdong ka agütsüba nung, Iran ket nung nuclear, missile malitsü aser America, Israel, Iran indang Arab kidanger linüktem aser alima asoshi kiralongrar timtem magütsütsü asoshi US Tir Donald Trump-i inyakba nung Israel dena lir, ta Netanyahu-i ashi.

Ajisüaka hopta ana i iba osang ya agütsü. Sharif-i iba mera ta tangsa tenzüksü ta ashi. Ajisüaka Lebanon indang National News Agency ajanga ashiba agi, Israel mitkar temi maneni linük south tsütsü amaker. Israel sepaitemi Tyre region künok Srifa jila nung bomb pokloktsü aser jila anasa ki ka nungi nisungtem ainshitsü totuyuba agütsü. Bodhbarnü Lebanese army-i nüburtem dang linük south leni meyipa maotsü ashi. US aser Israel nati Iran den

raraba nung Lebanon ya March 2 nü atsuoka Tehran den sendaktepa aliba Hezbollah teloki Israel dak amak tenzük. Rara tenzükba anogo mezüngbuba, February 28 nü nü Israel-i Iran indang Supreme Leader Ayatollah Ali Khamenei tepsetba aser Israel-i Lebanon den November 2024 nung züngzüktepa aliba ceasefire nung anogoshi amai aibelenba mechi amaker ta Hezbollah-i ashir. (Maneni tapak 8 nung...)

...

**Mr & Mrs. T. TOSHI JAMIR**  
**KIBONG KÜMER KÜM 40 ABENSA TEPELA SALEM**

Tsüngremer amsüh nung kaosema ozü tsürabur ana Pa tenüng nung ka küma longjemer lia arudang küm 40 tsüngda tako tanang tatsük talem tensa balala ajangdanga kibong nung onok chirnur nungi tenzuka kechisarina ajak nung talubosa moatsüba den arishir rongnung züngsema taküm tajung toktsüba Tsüngrem tenüng sanga tepela salem lemsateper. Ano maneni mera tasen tenzuka aodang apetasong kecha meküti onok asoshi akhüm aser jenokdak tajung südakja kibong wadang ajak nung temjena moajang ta chirnur ajaki sarasadema moatsür.

**SANGDONGER**

Ao Senso Telungjem Chümoukedima ajanga osang ka yamai sangdonger. Ao Senden-i tenyaksü nongloktsüba "Chümoukedima District litsü nung Aor telen ajak den shisa agitepa Telungjem sabang ka kubok aotsü asoshi" nükmen nung ajemdaker 14th April 2026 anogo nung mensem ka alitsü, iba mensem nung Chümoukedima District litsü telungtet nung yim shia nungi nebu anana arua shilem agitsü atema iba sangdong ajanga metetdaksür.

Mapang : 11:00 am  
 Tesentepdak : ASTC Kimen

Sd/-  
 (Dr. Moa Walling)  
 Tir, ASTC

*(Signature)*  
 (Wb. Lensenir Sanglir)  
 Tongti Zülur, ASTC

**AGS TRANSACT TECHNOLOGIES LIMITED**  
 (Under Corporate Insolvency Resolution Process)  
 Registered Office: 605-606, Trade World, B-Wing, Kamala Mills Compound, Senapati Bapat Marg, Lower Parel (West), Mumbai - 400013

AGS Transact Technologies Limited ("Corporate Debtor") ya tang Insolvency and Bankruptcy Code, 2016 kübok Corporate Insolvency Resolution Process (CIRP) nung lir aser Corporate Debtor ajanga India tesem balala nung ki o jen kibur/ali kibur den jembir rental/leave and license arrangements kübok Off-Site Automated Teller Machines (ATMs)/Cash Recyclers Machines (CRMs) amenoka amshia arur ta nüburtem, ali kibur, ki o jen kibur aser ajak nem metetdaksür.

CIRP kübok Corporate Debtor ajanga nangzükba ama onoki August 27, 2025 nü Form A nung (i) Free Press Journal Maharashtra Edition (English), (ii) Navshakti Maharashtra Edition (Marathi) nung nüburtem dang Corporate Debtor temi tagütsütsü tim magütsü aliba meshitsü asoshi ali kibur tem densema nüburtem nem sangdong agüja liasü. Iba sülen kasa sangdong metongshir September 3, 2025 nü sagdonga liasü.

Off Site ATM tesem kar nung tang mapa meinyaki lir, aser CIRP tenzükba mechi item mapa meinyakba ATM locations tem August 25, 2025 nungi cancelled aser/mesüra terminated süogo ta metetdaksür.

Iba yongji CIRP tenzükba anogo i.e. August 25, 2025 nü nungi tenzuka Company-i mapa meinyakba ATM locations dak sendakba nung rent, license fees, electricity charges, maintenance charges mesüra danga temonoktsü kecha magütsütsü.

Meneni claims mesüra takhangba kar tang mesüra iba sülen agütsüra, itemji insolvency aser Bankruptcy Code, 2016 nung shia aliba ama inaktsü. ATM machines, vaults, electronic equipment, signage aser danga sendakba osettsüset tem iba ama tesem nung inoka aliba ya Corporate Debtor aser/ mesüra banks tem meyong lir, aser ali kibur, ki o jen kibur mesüra third party temi onok nungi tezüluba nung temelaba magi item oset meloktsütsü mesüra magientsüla ta metetdaksür. Iba ama inyaksangshiba lira ozüng agi mela aliba ama mera agitsü.

Iba sangdong ya nüburtem nem metetdaksütsü atema aser tarutsü nung iba amala ATM locations dak sendakba nung mangatettep madoktsü mesüra temelaba makai kibur makumtsü asoshi agütsür.

Sd/-  
 CA Brijendra Kumar Mishra  
 Deemed Resolution Professional  
 AGS Transact Technologies Limited- Under CIRP  
 IIBI Registration No: IBB/1/PA-002/IP-N00109/2017-2018/10257 AFA  
 Details: AA2/10257/02/311226/204257 Valid till 31.12.2026  
 Date: 08.04.2026

## India U12 team-i Real Madrid Foundation World Challenge kokogo



**Rongchii/April 8, 2026 (Agencies):** India under-12 football team-i Real Madrid Foundation World Challenge kokogo. Iba asayamung ya Madrid, Spain nung Real Madrid training complex nung asaya liasü.

Iba asayamung nung India team alima nung youth team tajungtibatem den asayaogo aser parnoki asayamung tepeyong kanga junga asaya liasü. Final asaya nung parnoki Brazil team goal 3-0 agi koka liasü.

Iba takok anguba ya kanga dang tongtibang lir, kechiyong iba ya Europe nung club tulutiba kati ayongzükba asayamung aser team tajung aikati shilem agiogo. Iba ajanga India nung grassroots football ecosystem

tanem tanemi renloka aoba sayur, aser linük nung lanurtem terenlok atema alizüing tasen ka tongteta toktsüogo.

Kümshia asayaba iba asayamung ya taküm Easter hopta asayaogo, kong team 80 dak tema nung U10, U12 aser U14 category nung lanur asayar 1000 dak temai shilem agia liasü. Team tem ya Europe, North America, South America aser South Asia nungi liasü. Iba asayamung ajanga lanurtem nem Kylian Mbappé aser Vinícius Júnior nunger amala nüngtugu asayartem asayaba kasa tesem nung asayatsü asoshi maongka agütsüogo.

Asayamung nung India U14 team-ia kanga junga asaya-a parnok semi-finals tonga atu, saka tia maka parnoki Italy

makok. Iba asaya nung goal pongu tashi idaktsü. Asaya tanabuba shilem tatemtsü lia Italy team-i goal ka idaktsüba ajanga parnoki asaya koka liasü.

India team nung Delhi-NCR, Mumbai, Pune, Bengaluru aser Hyderabad nungi asayartem densema liasü. Parnoki Spain, Germany, Brazil, Uruguay, Mexico, USA, Canada, Malaysia, Azerbaijan aser Morocco nungi team tem madak takok ngua liasü.

Maneni iba asayamung indang official ambassador ji Brazil aser Real Madrid nungi taoba mapang nüngtugu asayar Roberto Carlos liasü, shibai asayartem den sensaksema taruba putu football asayartem ajungmesoa liasü.

## Romania nunger nüngtugu coach Mircea Lucescu süogo

**Rongchii/April 8, 2026 (Agencies):** Romania nunger nüngtugu coah aser taoba mapang linük team caoch Mircea Lucescu, temulungjang agi mapa minyaki akümba sülen arishi küm 80buba nung süogo, ta Bucharest hospital nungi sangdong ka ajanga metetdaksü.

Lucescu ya Slovakia den friendly ka asayatsü atema renemba mapang anogo 10 tejakdang temang mejungi aküm.

Temang anepalua pa heart rate tajungba akümba sülen pa mozükidang nungi yokatoktsü imla liasü.

Ajisüaka pa mozüki toktsütsüba anogo ano heart attack ka ajangshiba sülen pa asi.

Lucescu ya 1945 küm Bucharest nung aso, aser pa ya coach ka dang masü saka linük team nungia asayar ka liasü.

Asayar ka ama pa lenisüba nung Romania team 1970 FIFA World Cup nung asaya liasü. Pa linük tenüing nungi 65 ben asaya aser iba mapang goal 10 idakja liasü. Ajisüaka coach ka ama pai shilem tuluba agia liasü.

National team coach inyakba mapang pa lenisüba nung Romania team 1984 küm European Championship nung mezüingbuba asaya liasü.

Iba sülen pa ano 2024 küm pa küm ana atema linük coach mapa abentsü asoshi tenangzüktepa yanglu aser pa

lenisüba nung team tatemsa taküm March 26 nü asaya liasü. 1998 küm sülen Romania team tang mezüingbuba World Cup nung asayatsü timla aliba iba asaya nung tembangatok. Parnoki playoff nung goal 1-0 agi Turkey makok.

Club jenjang nung pa Italy, Turkey, aser Ukraine nung club balala nung inyakogo aser iba mapang takok marnok 30 dak tema bena pa ya Europe nung ajaki akümtsüba coach ka aküm.

Club balala den Turkey club Galatasaray-i pa nem tetushi agütsüogo. Pa lenisüba nung club-i domestic asayamung akokba den UEFA Super Cup-a ka koka liasü.

## Badminton Asia C'ships: Shetty-i fifth-seed Feng tsükdaksü

**Rongchii/April 8, 2026 (Agencies):** Tang asaya aliba Badminton Asia Championships tebur kija asaya nung Bodhbarnü India nunger asayar Ayush Shetty-i fifth-seed asayar Li Shi Feng straight games nung koka Round of 16 tongtetogo.

Ayush aser Li na tang mezüingbuba asaya liasü, aser Li ya World No. 7 asayar aser Asian Games gold medallist asünung ajaki pai akoktsü ta imla liasü.

Ajisüaka Ayush-i pa dang nungi tajungba asayateta 21-13, 21-16 agi asaya timtem mesüi koka taruba round tongtetogo.

Asaya mezüingbuba set nung Li ya yakta dang 4-1 agi

tejakdang aküm, saka Ayush-ia kanga junga asayateta tena point 7-all aküm aser iba sülen pai asaya amokbanger asaya-a mezüingbuba game koka liasü.

Tanabuba game nunga Li yakta dang 4-1 agi tejakdang aküm aser pai tajung asayateta 12-9 agi pa tejakdang aküm, ajisüaka iba sülen tena rongnung Ayush-i tajungba asayateta pa 18-13 agi tejakdang aküm.

Li-ia meranga asaya-a point 16-18 aküm, saka India nunger asayar yagi Li nem memeneddaksüi asaya-a tanabuba game ya 21-16 agi koka liasü.

2026 küm Ayush-i tang tashi

khen danga junga masayateti arudar, aser pai tang tashi nung asayamung ka nung danga quarterfinal tonga asayadanga mali. Ajisüaka Li akokba ajanga pa nem iba asayamung nung asayayonga aotsü atema pasasa dak tali temulung lemteta kumdaktsüsü.

Ayush taruba asaya Chinese Taipei nunger asayar Chi Yu Jen den asayatsü, shiba den pa taoba mapang BWF Tour nung asayaogo.

Bodhbarnüsa tetsür kija asaya nung India tsür Malvika Bansod-i 21-10, 21-19 agi Busanan Ongbamrunphan mekoki tsüko.

## UEFA Champions League: Arsenal aser Bayern nati takok angu

**Rongchii/April 8, 2026 (Agencies):** Mongolbarnü UEFA Champions League quarter-final mezüingbuba leg nung Arsenal team nung substitute Kai Havertz-i mapang apuloktsür asayaba mapang goal ka idakja parnoki goal 1-0 agi Sporting pur kokogo.

Germany nunger forward ya box telung nung shingaia menüki aliba mapang Gabriel Martinelli-i pa nem ball agüja pai goalkeeper Rui Silva adena ball metsüokja parnoki goal ka yagi asaya koka liasü.

Asaya mezüingbuba shilem nung Sporting nungi Maxi Araujo aser Arsenal nungi Noni Madueke napronglai goal idaktsütsü maongka angu, saka tenati metsüba ball post nung ondak. Arsenal nungi asayar Martin Zubimendi-i goal ka idaktsü saka iba goal magi aser David Raya-ia Sporting puri goal idaktsütsü merangba aika nokdanga liasü.

Ajisüaka asaya tatemtsü lia Havertz-i goal ka idakja parnoki asaya akok. Havertz ya minute 70buba nung Martin Odegaard yiruba ajanga pa melena ia liasü. Iba asaya akokba sülen taruba hopta tanabuba leg masaya tsüingda Arsenal pur jenjang tajungba kumdaktsüogo.

Iba asaya shirnoki kokdir parnok Barcelona mesüra Atletico Madrid den asayatsü, shirnok Nou Camp nung Bodhbarnü asayatsü lir.

Premier League nung

temaba jenjang nung aliba Arsenal team ya Honibarnü Bournemouth den asayatsü lir.

Kasa asayamung tanga quarter-final asaya ka nung Bayern Munich-i Santiago Bernabeu nung goal 2-1 agi Real Madrid koka parnok temaba jenjang nung lir.

Vincent Kompany-i aniba team yagi asaya mezüingbuba shilem matem tsüingda mezüingbuba goal idaktsü. Minute 41buba nung Serge Gnabry-i ball tajung ka agütsüba Luis Diaz-i agizüka goalkeeper Andriy Lunin adena ball metsüokja liasü.

Iba sülen asaya tanabuba shilem tenzüker mapang tatsüka dang lir counter-attack ka asüba mapang Michael Olise-i Harry Kane nem ball agütsü, koba Kane-i box kümbang nungi kanga junga metsüokja liasü.

Asaya tenzüker ghonda ka ajungba mapang Real puri tajungba asaya tenzüka Kylian Mbappe-i minute 74buba nung Trent Alexander-Arnold-i agütsüba ball ka kanga junga idakja liasü.

Iba sülen Mbappe aser Vinicius Jr nati goal idaktsütsü maongka nguteta ball metsüoktsü, saka Manuel Neuer-i kanga junga nokdanga liasü.

Leg ana asayaba sülen asaya shiba kokdir parnok Paris St Germain mesüra Liverpool den asayatsü, shirnok Bodhbarnü mezüingbuba leg asayatsü lir.

## BENDANGLI OSANG : Tapak 7 nungi...

### US-Iran ceasefire nung...

March 2 nü nungi tenzüka Israel-i Lebanon nung amakdang nisung 1,500 dak tema tepsetogo aser nisung 1.2 million dak tema pei ki yutsür tesem balala nung jenshia lir ta Lebanon ketdangsür temi ashir.

Iran nung raraba hopta ana ceasefire alitsü sangdonger ghonda ishika lir Israel nung yimtenren tsütsü mangatettep adoka lir, koba US Tir Donald Trump-i sangdonga liasü.

Opposition leader Yair Lapid-i ato kilonser kanga sashia aitsü. X nung post ka nung, "Asen puti otsü ajunga nung iba ama yimtenren tsütsü takoksa kodanga majuru. Asen national security indang tongtipangtiba telemtetba agidang Israel ya jembishinü langpang nunga meliasü," ta Lapid-i ashi.

"Mitkar temi parnok dang ashiba ajak inyak, nüburtemi timtem aremba sayuogo, saka Netanyahu-i yimtenren tsütsü,

asalentong tsütsü takok mangu, aser pai yangluba nukjidong kata mataloktet. Asükum, senzüka yutsüba aser sentong tejangja maliba ajanga yimtenren aser sentong balala raksaba yanglushitsü küm aika agitsü," ta pai ashi.

Sorkari iba mera ya bhukumer saka Iran-i tangsa Strait of Hormuz tanaben lapoktsüla aser US, Israel aser region nung danga linüktem amakba anentsüla ta ashir.

Iran-i United States den jembishinü ya April 10 nü Islamabad nung tenzüksü ta ashir.

Israel-i hopta ana ceasefire alitsü aser Iran nung bomb pokloktsüba anentsü mulungogo, ta White House ketdangsür anati ashi. Kasa mapang iba yimjung ken o tetsüingta ia jembisang Shehbaz Sharif-ibo agreement nungya Israel-i Lebanon nung amakba anentsü densema lir ta ashi.

## BILEMDANGANG

"Tangar o agi na tanishidaktsü."